



又獻通考卷之二百四十五

郵 陽 馬 端臨 貴與 著

經籍考

集 詩集

韓子蒼集三卷

晁氏曰宋朝韓駒字子蒼仙井人政和初詣闕上書特命以官累擢中書舍人權直學士院王甫嘗命子蒼誅其家藏太乙真人圖詩盛得一世宣和間獨以能詩稱云

後村劉氏曰子蒼蜀人學出蘇氏與豫章不相接呂公強之入泮子蒼殊不樂磨泮剪截之功終身改竄不已有已寫寄人數年而追取更易一兩字者故所作雖少而善

許表民詩十卷

晁氏曰許彥國字表民青社人周邦彥稱其寬平優游中極物情



惜乎流落不偶故世人知之者或寡也

還還集二卷

陳氏曰直龍圖閣江陵高荷子勉撰

山谷跋高子勉作詩以杜子美為標準用一事如軍中之令置二字如閨門之鍵而充之以博學行之以溫恭天下士也

又跋歐陽元老詩此詩入陶淵明格律頗雍容使高子勉追之或未能然子勉作唐律五言數十韻用事穩貼置字有力元老亦未能也

後村劉氏曰子勉親見山谷經指授記覽多如麥城詩押險韻畧無窘態集中健語層出紫微公詩派乃以殿諸人何耶可升

東湖集二卷

陳氏曰樞密豫章徐俯師川撰禧之子魯直諸甥思陵以魯直故召用之丞相呂頤浩作書具道上旨而一時或言其由中人以進

其初除大坡也程俱在西掖繳奏不行奉祠去其然乎否耶然俯在位亦不聞有所建明也

山谷跋前曰洪龜父携師川上藍莊詩來詞氣甚壯筆力絕不類年少書生意其行已讀書皆當老成解事熟讀數過為之喜而不寐老舅年衰才劣不足學師川有意日新之功當於古人中求之耳後村劉氏曰師川豫章之甥然自為一家不似涇陽高自標樹貌視一世同時諸人多推下之然集中不能皆善舊傳豫章見師川雙廟詩勉諸洪進步今雙廟詩不存則其詩零落多矣師川在靖康中以名節自任呼如曰故其詩云直道庶幾師柳下不應四海獨詩名可謂實錄諸人所以推下之者蓋不獨以其詩也

東萊集二十卷外集二卷

晁氏曰呂本中字居仁好問右丞之長子靖康初權尚書即紹興中賜進士第除右史遷中書舍人已而落職奉祠少學山谷為詩



嘗作江西宗派圖行於世

陳氏曰希哲之孫好問之子祖謙之祖撰江西詩派後久以其詩入派中

後村劉氏曰紫微公作夏均父集序云學詩當識活法所謂活法者規矩備具而能出於規矩之外變化不測而亦不背於規矩也是道也蓋有定法而無定法無定法而有定法知是者則可以與語活法矣謝元暉有言好詩流轉圓美如彈丸此真活法也近世惟豫章黃公首變前作之弊而後學者知所趣向畢精盡知左規右矩庶幾至於變化不測然予區區淺末之論皆漢魏以來有意於文者之法而非無意於文者之法也子曰興於詩又曰詩可以興可以觀可以群可以怨邇之事父遠之事君多識於鳥獸草木之名今之爲詩者讀之果可以使人興起其爲善之心乎果可以使人興觀群怨乎果可以使人知事父事君而能識鳥獸草木之名之理乎爲之而不能使人如是則如勿作吾友夏均父賢而有文章其於詩蓋得所謂規矩備具而出於規矩之外變化不測者後更多從先生長者游聞聖人之所以言詩者而得其要妙所謂無意於文之文而非有意於文之文也余嘗以爲此序天下之至言也然均父所作似未能然往往紫微公自道耳所引謝宣城好詩流轉圓美如彈丸之語余以宣城詩考之如錦工機錦玉人琢玉極天下巧妙窮巧極妙然後能流轉圓美近時學者往往誤認彈丸之喻而趨於易故放翁詩云彈丸之論方誤人又朱文公云紫微論詩欲字字響其晚年詩多啞了然則欲知紫微詩者以均父集序觀之則知彈丸之語非主於易又以文公之語驗之則所謂字字響者果不可以退情矣

晁氏具茨集三卷

晁氏曰先君子詩集也呂本中以爲江西宗派曾慥亦稱公早受



知於陳無已從兄以道嘗謂公宗族中最才華喻汝礪序其詩云  
予嘗從叔用商近朝人物嘉言善行朝章國典禮文損益靡不貴  
洽由叔用之學而達諸廊廟溫厚足以代言淵博足以顧問則以  
詩鳴者是豈叔用之志也哉雖然叔用既已油然棲志於林澗曠  
遠之中遇事寫物形於興屬淵雅踈亮未嘗為悽怨危憤之音予  
於是有以見叔用於消長用舍之際未嘗不安而樂之者也嗟乎  
所謂含章內奧而深於道者非耶秦漢以來士有抱可懷能流落  
不遇往往躁心汗筆有怨詠沈抑之思氣候急刻不能閑遠古之  
詞人皆是也所以往往無所建立於天下唯深於道者遺於世而  
不然發於詞而不怒君子是以知其必能有為於世者也嗟乎吾  
於叔用豈直以詩人命之哉

陳氏曰晁冲之叔用撰冲之在群從中亦有才華而獨不第紹聖  
以來黨禍既作超然獨性侍郎公武子止蓋其子也

後村劉氏曰喻汝礪所作序筆力浩大與叔用之詩相稱余讀叔  
用詩見其意度宏濶氣力寬餘一洗詩人窮餓酸辛之態其律詩  
云不擬伊優陪殿下相隨于為過樓前亂離後追書承平事未有  
悲哀警策於此句者晁氏家世顯貴而叔用不肯於此時陪伊優  
之列而甘隨于為之後可謂賢矣他作皆激烈慷慨南渡放翁可  
以繼之

溪集一卷

陳氏曰臨川汪莘信民撰呂居仁序之

後村劉氏曰呂榮陽居符隱信民為教官從榮陽學故紫微公志  
推尊信民其詩云富貴空中花文章木上塵要知真實地惟有董  
嚴境蓋呂氏家世本喜談禪而紫微與信民皆尚禪學

遠遊堂集二卷

陳氏曰知江州新春夏倪均父撰



後村劉氏曰均父疎之諸孫集中如擬陶韋五言登臺逼真律詩用事琢句超出編墨言近旨遠可以調味蓋用功於詩而非所謂無意於文之文也

歸史集一卷

陳氏曰開封王直方立之撰其高祖顯事晉郎至樞密使直方喜從蘇黃諸名勝游家有園地娶宗女為假承奉郎自號歸史年甫四十而死

李希聲集一卷

陳氏曰秘書丞李希聲撰與徐師川潘邠老同時

楊信祖集一卷

陳氏曰楊符信祖撰未詳出處

後村劉氏曰吏道官官惡田家事事賢唐人得意語也

陳留集一卷

陳氏曰開封江端本子之撰以上至林子仁皆入詩派

後村劉氏曰子我弟也子我詩多而工江西派乃舍兄而取弟亦不可曉豈子我自為家不肯入社如韓子蒼耶

邵茂誠詩集

邵迎茂誠撰東坡序畧曰茂誠出其詩數百篇余讀之彌月不厭其文清和妙麗如晉宋間人而詩尤可愛咀嚼有味雜以江左唐人之風

王定國詩集

王鞏定國撰東坡序畧曰古今詩人衆矣而社子美為首豈非以其流落飢寒終身不用而一飯未嘗忘君也歟今定國以余故得罪貶海上三年一子死貶所一子死于家定國亦病幾死余意其怨我甚不敢以書相聞而定國歸至江西以其嶺外所作詩數百首寄余皆清平豐融藹有治世之音其言與志得道行者無異幽



憂憤歎之作蓋亦有之矣特恐死嶺外而天子之恩不及報以忝其父祖耳孔子曰不怨天不尤人定國且不我然而肯怨天乎余然後廢卷而歎自恨知其人之淺也又念昔者定國與顏復長道游泗水登桓山吹笛飲酒乘月而歸余亦置酒黃樓上以待之曰李太白死世無此樂三百年矣今余老不復作詩又以病止酒閉門不出門外數步即大江經月不至江上眈眈焉真一老農夫也而定國詩益工飲酒不衰所至窮山水之勝不以厄窮衰老改其度今而後余之所畏服於定國者不獨其詩也

山谷序畧曰定國生長富貴其嗜好皆老書生事而不寒乞諸公多下之其為文章初不自貴珍如落涕唾時出奇壯語驚天下上及流落嶺南更折節自刻苦讀諸經頗立訓傳以示意得其作詩及他文章不守近世師儒繩尺規模遠大必有為而後作欲以長雄一時雖未盡如意要不隨人後至其合處便不減古人

胡宗元詩集

清江胡宗元撰山谷序畧曰君自結髮至白首未嘗廢書其曾次所藏未肯下一世事也前莫輓後莫推是以窮於丘壑然以其耆老於翰墨故後生晚出無不讀書而好文其卒也子弟門人次其詩為若干卷觀宗元之詩好賢而樂善安土而俟時寡怨之言也可以追次其平生見其少長不倦忠信之士也至於遇變而出奇因難而見巧則又似予所論詩人之態也其興託高遠則附于國風其忿世疾邪則附于楚辭後之觀宗元詩者亦以是求之

畢憲父詩集三卷

河南畢憲父撰山谷序畧曰公貫穿六藝下至安成虞初之記射匿候歲種魚相蚕之篇鼻嚏耳鳴之占劾召鬼物之書無不口講指畫使疑者冰開虛心者滿懷其詩筆語皆有所從來不虛道非博極群書不能讀之昭然也



吳處士靈谷詩

王介甫序畧曰君浩然有以自養遂遊於山川之間嘯歌謳吟以寓其所好終身樂之不厭而有詩數百篇傳誦於閭里他日日出其靈谷三十二篇以屬其甥曰爲我讀而序之惟君之所得蓋有伏而不見者豈特盡於此詩而已雖然觀其鑱刻萬物而按之以藻績非夫人之巧亦熟能至於此

李少卿詩二十卷

太常少卿李簡夫撰頴濱序略曰君所爲詩曠然閑放往往脫畧繩墨有遺我忘物之思問其所與遊多慶曆名卿而元獻晏公深知之求其平生之志則曰樂天吾師也吾慕其爲人而學其詩患莫能及耳晚歲詩益高信乎其似樂天也

七里先生自然集七卷

陳氏曰江端友子我撰端本兄也休復鄰幾之孫其父懋相有遺

澤子我以遜端本靖康初吳敏一元中薦子我召見賜出身爲京官後至太常少卿

澗上丈人詩二十卷

晁氏曰陳恬字叔易堯叟裔孫也博學有高志不從選舉躬耕于陽翟與鮮于綽崔鷗齊名號陽城三士又與晁以道同卜隱居于嵩山大觀中召赴闕除校書郎以道寄詩戲之曰處士何人爲作牙暫携猿鶴到京華故山巖壑應惆悵六六峯前只一家未幾致仕還山建炎初再召避地桂嶺卒年七十四秩朝奉郎直秘閣澗上丈人者其自號也詩句豪健嘗作古別離紀靖康之難一時傳誦之筆札清勁與人尺牘主皆藏去以爲寶云

臨漢集七卷

陳氏曰南豐曾紘伯容撰其父阜子山於子因爲從兄弟懷峴居士集六卷



陳氏曰曾思顯道撰紘之子也嘗將漕湖南後家襄陽紘父子皆有官而皆高亢不仕揚誠齋序其詩以附詩派之後

序畧曰伯容詩源委山谷先生顯道得其父句法伯容放浪江湖間與夏均父諸詩人游從唱和其題壁與韻見於均父集中者三十有二篇予每誦均父之詩云曾侯第一又云五言類玄度又云秀句無一塵想見其詩而恨不見也行天下五十年每見士大夫必問伯容父子詩無能傳之者今日忽得故人尚書即江西漕雷公朝宗寄余以二曾詩集二編屬序之披誦三過蔚乎若玉井之蓮敷月露之下也沛乎若雪山之水寫灑瀨而東也琅乎若岐山之鳳鳴梧竹之風也望山谷之宮庭蓋排闥而入歷階而升者歟見南山集二十卷

陳氏曰秘閣修撰吳興劉宗無言撰

瀟山集三卷

陳氏曰中書舍人龍舒朱翌新仲撰

周平園序畧曰藝之至者不兩能故唐之詩人或略於文兼之者杜牧之乎苦心爲詩自其所長至於議論切當世之務制誥得玉言之體賦序碑記未嘗苟作予每讀其書愛之恨不同時今吾先友桐鄉朱公似之公世文儒少年登政和進士第時人諱言詩公獨沉涵六義思繼作者南渡後登館閣掌書命文章浸顯于朝中忤時宰謫居曲江十有四年昌其詩放厥詞蓋斥父窮極益自刻苦於山水間迨北歸則詩益老文益奇遂以名家其子軾等類公遺藁凡四十四卷屬余序之

曾文清集十五卷

陳氏曰禮部侍郎章貢曾幾吉父撰本朝曾氏三望最初溫陵宣靖公公亮明仲次南豐舍人鞏子固兄弟然其祖致堯起家又在溫陵之先矣其後則幾之族也自贛徙河南與其兄楸叔夏開天



游皆嘗貳春官林至尚書開沮和議得罪並有名於世又有長兄  
弼爲湖北提舉學事渡江溺死幾以其遺澤補官詮試第一賜上  
舍出身清江三孔之甥也紹興末幾已老始擢用乾道中年八十  
三以死號茶山先生其子逢遠皆顯於時

天台集十卷外集四卷長短句二卷附

陳氏曰臨海陳克子高撰李更子長跋其後云刪定鄉人也少小  
侍運判公貽序官學四方曾結詩選叙爲金陵人蓋失其實今老  
集中首末多在建康且嘗就試焉當是僑寓也詩選又言不事科  
舉以呂安老薦入幕府得官按集有聞榜二絕則嘗應舉矣又有  
甲午歲所作詩云三十四則其生當在元豐辛酉得官入幕蓋已  
老矣詩多情致詞尤工

西溪居士集五卷

陳氏曰剡川姚寬令威撰待制舜明廷輝之子兄宏令聲爲刪定  
官得罪秦檜死大理獄寬爲六部監門逆亮入寇寬言木德所照  
必無虞言驗將除卽召對行疾仆殿上卒遂用其弟憲令則後至  
執政

集句詩三卷

陳氏曰江陰葛次仲亞卿撰勝仲之兄兄弟皆爲大司成

廬溪集七卷

陳氏曰直敷文閣廬陵王庭珪民瞻撰政和八年進士仕不合棄  
去隱居數十年坐作詩送胡邦衡除名徙辰州年已七十矣阜陵  
初政召爲國子監主簿九十餘乃終寄祿纔承奉卽澤竟不及後  
周益公在位欲委曲成就之卒不可

楊誠齋序畧曰先生少嘗見曹子方詩法蓋其詩自少陵出其文  
自昌黎出大要主於雄剛渾大云清江劉清之子澄詳先生之文  
謂廬陵自六一之後惟先生可繼聞者躋焉



韋齋小集一卷

陳氏曰朱松喬年撰

玉瀾集一卷

陳氏曰朱棐逢年撰韋齋之弟晦庵之叔父也嘗夢為玉瀾堂之游甚異有詩紀之

雲壑隱居集三卷

陳氏曰南城蔡枏堅老撰宣和以前人沒於乾道庚寅曾公卷呂居仁輩皆與之唱和

陳正獻集十卷

陳氏曰丞相福正獻公莆田陳俊卿應求撰紹興八年進士第二人乾淳間名相與虞井甫異論去國

靜恭堂集十卷

陳氏曰參政莆田龔茂良實之撰黃公度以甫人魁天下陳正獻

次之故事拜黃甲推最老者一人最少者一人是歲茂良年最少甫人以為盛事後叅大政相位又虛寔行相事坐撻會觀直省官忤阜陵意用謝廓然賜出身入臺擊罷之遂謫英州以沒其風節凜凜為世名臣

寓山集三十卷

陳氏曰吳興沈仲詰明遠撰丞相該之姪紹興五年進士改官為江西運管嘗為悲扇工詩忤魏良臣陷以深文奪三官不得志以卒

劍南詩藁二十卷續藁六十七卷

陳氏曰陸游務觀撰初為嚴州刻所藁止淳熙丁未自戊申以及其終當嘉定庚午二十餘年為詩益多其幼子子適後守嚴州續刻之篇什富以萬計古所無也

後村劉氏曰近歲詩人雜博者堆隊仗空疎者窘材料出奇者費搜索縛律者少變化惟放翁記問足以貫通力量足以驅使才思



足以發越氣魄足以陵暴南渡而下故當為一大宗末年云客從  
謝事歸時散詩到無人愛處工又云外物不移方是學俗人猶愛  
未為詩則皮毛落盡矣

雪巢小集二卷

陳氏曰東魯林憲景思撰初寓吳興從徐度敦立游後為參政賀  
允中子忱孫壻寓臨海其人高尚詩清澹五言四韻古句尤佳殆  
逼陶謝梁谿尤延之誠齋楊廷秀皆為之序且為雪巢賦及記余  
為南城其子游謁至邑以家集見示愛而錄之及守天台則板行  
久矣視所錄本稍多然其暮年詩似不逮其初往往以貧為累不  
能不衰素也

誠齋序畧曰延之謂景思詩似唐人信矣然至如桃花飛後楊花  
飛楊花飛後無可飛天空而相無影等句超出詩人準繩之外其遐  
不可追其卓不可跂矣使一太白在必笑領此句也似唐人而已乎

王季夷北海集二卷

陳氏曰北海王岵季夷撰紹淳明山名士寓居吳興陸務觀與之厚  
善三子甲田申皆登科

易足居士自鳴集十五卷

陳氏曰鄱陽章甫冠之撰居吳下自號轉庵作易足堂韓無咎為  
之記

屏山七者翁十卷

陳氏曰從事郎崇安劉璘平父撰子翬彥冲之子也

玉雪小集六卷外集七卷

陳氏曰太常博士龍泉何倫德撰隆興初在朝言和議觸時相  
去後不復召歷麾節而卒

雪山集三卷

陳氏曰富川王質景文撰質游太學治詩有聲仕為樞屬嘗著詩



解三十卷未之見也

景物類要詩十卷

陳氏曰東陽曹冠宗臣撰此物為題類事詩凡二百餘篇冠為秦檜客與其孫煊同登甲科未幾秦亡奪前名恩數再赴廷試仕至

知郴州

同庵集一卷

陳氏曰吳興施士衡德求聖嘗試中教官為宣州簽幕坐廢銜復仕竟不進

柘山老人集八卷

陳氏曰龍泉李相文成撰

三逕老人砥礪集十三卷

陳氏曰福建提舉常平昭以杜北愛言撰胡憲原仲為之序其生世龍圖閣直學士錫本常以無錫人其孫天章閣待制祀於祀為

曾祖

穀城集五卷

陳氏曰建安黃銖子厚撰晦庵序極稱之

松坡集七卷樂府一卷

陳氏曰丞相豫章京鏗仲遠撰使虜執節驟用其在相位當韓

侂胄用事無所立

白石道人集三卷

陳氏曰鄱陽姜夔堯章撰千蘭東夫識之於年少客游以其兄之子妻之石湖范至能尤愛詩揚誠齋亦愛之賞其歲除舟行

十絕以為有裁雲縫月之妙敲金戛玉之奇聲夔頗解音律進

樂書免解不第而卒詞亦工

轉庵集一卷

陳氏曰閩門舍人永嘉潘檉繼父撰



王秘監集四卷

陳氏曰永嘉王柎木叔撰

顧庵詩藁

四明劉應時良佐撰楊誠齋序畧曰君之詩放翁陸務觀既摘其佳句序之余尚何言偶披卷注望云寂寞黃昏愁弔影雪窓怕上短檠燈又燭與梅花共過冬必月故移疎影去又睡魔正與詩魔戰窗外一聲婆餅焦又早行二鷄犬未鳴潮半落草蟲聲在豆花村使晚唐諸子與半山老人目之當一笑曰不虞君之涉吾地也何故

歐陽伯威詩

廬陵歐陽伯威少與周益公同 塲屋連戰不利篤意於詩誠齋嘗摘其警句抄之如西風五更雨 田鴛數行書詩成喚子國人在仲宣樓細雨雙飛鷺寒蓑獨釣艇 安回千里外燈轉一窻深誰知花

過半纔與酒相尋故人驚會面新恨說從頭天上張公子雲間陸士龍月白玄猿哭更殘絡緯悲語難遽如許話舊復何時巷南巷北人招飲一雨一晴花耐看有客過門湖海士隔籬呼酒吐嗟間夢回金馬玉堂上文在水甌雪枕中青山如故情非改芳草喚愁詩遣愁擾擾征人相顧語蕭蕭落木不勝秋風色似傳花信到夕陽微放柳梢晴千里歸來人事改十年猶幸此身存絕句四首戀樹殘紅濕不飛楊花雪落水生衣年來百念成灰冷無語送春春自歸桑麻得雨更青葱芍藥留春結晚紅怪得鳥聲如許好此身還在亂山中為憐紅杏亞枝斜看到斜陽送亂鴉又是一春窮不死天教留眼看鶯花蓬蓬卧聽疎疎雨却似芭蕉夜半聲煙浪蔽天天倚蓋畧容一點白鷗明公跋云鳥啼花落欣然會心處酌大白嚙伯威詩欲馭風騎氣也

醒庵遺珠集十卷



陳氏曰臨川余國寶撰淳熙前人

白石丁藁一卷

陳氏曰三山黃景說巖老撰淳熙辛丑進士  
復齋漫藁二卷

陳氏曰知台州黃管子耕撰

梅山詩藁六卷續藁十五卷

陳氏曰括蒼姜特立邦傑撰以父死事得西班累舉不第晚爲閤  
職春坊攀附已酉龍飛恩至節度使周益公留衛公皆爲其所間  
特立詩亦粗佳韓無咎陸務觀皆愛之本亦士人也塗轍一異儼  
然誓御之態豈其居使之然耶

冷然齋集二十卷

陳氏曰山陰蘇洵召叟撰丞相子容四世孫師德仁仲之孫

曾文公詩詞一卷

陳氏曰知台州曾博欲父撰紆之子也皆在台時所作  
瓦全居士詩詞二卷

陳氏曰太常博士寧海王澡身甫撰初名津字子知

疎寮集三卷

陳氏曰四明高似孫續古撰少有俊聲登甲辰科不自愛重爲館  
職上韓侂胄生日詩九首皆暗用錫字爲清議所不齒晚知處州  
貪酷尤甚其讀書以隱僻爲博其作文以怪澁爲奇至有甚可笑  
者就中詩猶可觀也

徐照集三卷

陳氏曰永嘉徐照道暉撰自號天民

徐璣集二卷

陳氏曰徐璣致中撰

翁卷集一卷



陳氏曰翁卷靈舒撰

趙師秀集二卷別本天樂堂集一卷

陳氏曰趙師秀紫芝撰四人者號永嘉四靈皆晚唐體者也惟師秀嘗登科改官亦不顯

水心徐道暉墓誌畧曰道暉有詩數百斷思尤奇皆橫絕欲起冰懸雪跨使讀者變踣慘慄肯首吟歎不自已然無異語皆人所知也人不能道耳蓋魏晉名家多發興高遠之言少騷物切近之實及沈約謝朓求明體出士爭效之初猶甚艱或僅得一偶句便已名世矣夫束字十餘五色彰施而律呂相命豈易工哉故善爲是者取成於心寄妍於物融會一法涵受萬象豨苓桔梗時而爲帝無不按節赴之君尊臣卑賓願主穆如九投區矢破的此唐人之精也然厭之者謂其纖碎而害道淫肆而亂雅至於廷設九奏廣袖大幅而反以浮響疑宮商布縷謬組繡則失其所以爲詩矣然

則發今八未悟之機四百年已廢之學使後復言唐詩者自君始不亦詞人墨客之一快也惜其不尚以年不及臻乎開元元和之盛而君旣死同爲唐詩者徐璣字文淵翁卷字靈舒趙師秀字紫芝紫芝集常友朋殯且葬之

李孟達集一卷

陳氏曰宗正丞宣城李兼孟達撰唐末李咸用披沙集者即其遠祖也嘗知台州時稱善士

柯東海集十五卷

陳氏曰莆田柯夢得東海撰嘗試春官不第

山中集一卷

陳氏曰莆田趙庚夫仲白撰兩上春官不第以取應得右選不得志而沒劉潛夫志其墓擇其詩百篇屬趙南塘序而傳之

後村劉氏墓誌畧曰仲白平生志業無所洩一寓之詩叢藁如山



和平冲澹之語可咀而味憤悱悲壯之詞可愕而怒流離顛沛之作可怨而泣也遇貴公張宴廣座命題衆賓方嘖呻營度仲白已飛筆滿軸神色自得蓋其所狹高未嘗斲壓人而每出人上故愛仲白者少嚴而忌之者衆矣其詩最多自刪取五百首

磬沼集一卷

陳氏曰崇仁羅鑑正仲撰樞密春伯之從弟磬沼者爲池因地曲折如磬然

茅齋集二卷

陳氏曰南城鄧繼祖撰

槐林集十卷

陳氏曰吳郡沈繼祖撰慶元初有爲察官者家富川豈即其人固不足道詩亦無可觀者

花翁集一卷

陳氏曰開封孫惟信季繁撰在江湖中頗有標致多見前輩多舊事善雅談長短句尤工嘗有官弃去不仕

惠崇集十卷

陳氏曰淮南僧惠崇撰與潘閔同時在九僧之數亦善畫

天竺靈苑集三卷採遺一卷

陳氏曰錢塘僧遵式撰所謂式懺主者也

渚宮集三卷

陳氏曰錢塘僧文瑩道暹撰及識蘇子美嘗題其詩後欲挽致於歐陽永叔而瑩辭不往老於荊州之金鑾鄭毅爲作序

棟金集一卷

陳氏曰螺江僧可尚撰有送徐鉉詩蓋國初人

螺江集一卷

陳氏曰僧有朋撰號困山禪師族陳氏閩帥巖六世孫



祕演詩集

釋祕演撰歐陽公序畧曰祕演與石曼卿交最久亦能遺外世俗以氣節相高二人懽然無所間曼卿隱於酒祕演隱於浮屠皆奇男子也然喜爲歌詩以自娛當其極飲大醉歌吟笑呼以適天下之樂何其壯也一時賢士皆願從其游予亦時至其室十年之間祕演北渡河東之濟鄆無所合困而歸曼卿已死祕演已老病嗟夫二人者予乃見其盛衰則余亦將老矣夫曼卿詩辭清絕尤稱祕演之作以爲雅健有詩人之意祕演狀貌雄傑其中浩然既習于佛無所用獨其詩可行于世而懶不自惜已老肱其橐尚得三四百篇皆可喜者曼卿死祕演漠然無所向聞東南多山水其巔崖嶠嶂江濤洶涌甚可壯也遂欲遠遊焉凡以知其老而志在也

惟儼集

釋惟儼杭州人姓魏氏歐陽公序其詩曰與亡友石曼卿最善居

京師相國浮圖不出其戶十五年士嘗遊其室者禮之惟恐不至及去爲公卿貴人未始一往干之然嘗竊怪平生所交皆當世賢傑未見卓卓著功業如古人可記者因謂世所稱賢材若不筭兵走萬里立功海外則當佐天子號令賞罰於明堂苟皆不用則絕寵辱遺世俗自高而不屈尚安能酣豢於富貴而無爲哉醉則以此誚其坐人人亦復之以謂遺世自守古人之所易若奮身逢時欲必就功業此雖聖賢難之周孔所以窮達異也今子老於浮圖不見用於世而幸不踐窮亨之塗乃以古事之已然而責今人之必然邪雖然惟儼傲乎退偃於一室天下之務當世之利病聽其言終日不厭惜其將老也已曼卿死惟儼亦買地京城之東以謀其終乃歛平生所爲文數百篇示予曰曼卿之死旣已表其墓願爲我序其文然及我之見也嗟夫惟儼旣不用於世其材莫見於時若考其筆墨馳聘文章贍述之能可以見其志矣



參寥集十二卷

晁氏曰皇朝僧道潛自號參寥子與蘇子瞻秦少游為詩友其詩清麗不類浮屠語世稱其東園贈歌者兩絕句餘多類此

陳氏曰唐人舊有號參寥子者用莊子語也

后山序曰妙摠師參寥大覺老之嗣眉山公之客而少游氏之友也釋門之表士林之秀而詩苑之英也游卿大夫之間名于四海三十年餘矣其議古今張弛人情貌肖否言之從違詩之精粗若水赴壑阪走丸倒囊出物鷲鳥舉而風迫之也若升高視下肥瘠而鑑貌也元符之冬去魯還吳道徐而來見余與之別餘二十年復見于此愛其詩讀不捨手屬其談挽不聽去夜相語及唐詩僧參寥子曰貫休齊已世薄其語然以曠蕩逸群之氣高世之志天下之譽王侯將相之奉而為石霜老師之役終其身不去此豈用意於詩者工拙不足病也由是而知余之所貴乃其棄遺所謂淺

為丈夫者乎於其行叙以謝之

希白詩三卷

晁氏曰僧希白撰張逸序之曰希白能詩與宋白梁周翰張詠而下十數友善其格律不減齊已云

物外集三卷

陳氏曰僧德洪覺範撰

瀑泉集十三卷

陳氏曰僧祖可正平撰蘇養直之弟有惡疾號癩可

真隱集三卷

陳氏曰僧善權巽中撰靖安人落魄嗜酒

化庵湖海集二卷

陳氏曰僧法具園復撰吳興人

涪溪集二十一卷



陳氏曰僧顯萬撰洪景廬作亭前二卷為賦餘皆詩也

女郎謝希孟集二卷

陳氏曰閩人謝景山之妹嫁陳安國年三十三而死其詩甚可觀  
歐陽公為之序言有古淑女幽間之風雅非特婦人之言也景山  
者按歐陽詩話言謝伯初字景山當天聖景祐間以詩知名余調  
夷陵景山為許州法曹以長韻見寄頗多佳句仕不偶困窮以卒  
詩亦不見於世此序又言景山少以進士一舉甲科考登科記天  
聖二年甲科但有謝伯景而謝伯初者乃在寶元元年公謫夷陵  
當景祐三年景山已為法曹則非寶元登第者名字差闕如此未  
可考也

歐陽氏序畧曰希孟之言尤隱約深厚守道而不自放有古幽間  
淑女之風非特婦人之能言者也然景山出於從今世賢豪者游故  
得聞於當世而希孟不幸為女子莫自章顯於世昔衛莊姜許穆  
夫人錄於仲尼而列之國風今有傑然巨人能輕重時人而取信  
後世者一為希孟重之其不泯沒矣

處士王安之集一卷

陳氏曰簡池王亢子倉之女尚恭字安之年二十未嫁而死乾道  
戊子也亢自志其墓有任公鼎老為作集序援歐公所序謝希孟  
為此而稱其詩不傳今余家有之任蓋未之見也

英華集三卷

陳氏曰李季萼死後為鬼仙事見夷堅志縉雲人傳其集亦怪矣





鄱陽馬端臨貴與著

經籍考

集歌詞

竹間集十卷

陳氏曰蜀歐陽炯作序稱衛尉少卿字弘基者所集未詳何人其詞自溫飛卿而下十八人凡五百首此近世倚聲填詞之祖也詩至晚唐五季氣格卑陋千人一律而長短句獨精巧高麗後世莫及此事之不可曉者放翁陸務觀之言云爾

南唐二主詞一卷

陳氏曰中主李璟後主李煜撰卷首四闕應天長望遠行各一浣溪沙一中主所作重光嘗書之墨迹在盱江晁氏趙云先皇御製歌詞余嘗見之於麥光紙上作撥鐙書有晁景迂題字今不知何在



矣餘詞皆重光作

陽春錄一卷

陳氏曰南唐馮延巳撰高郵崔公度伯易題其後稱其家所藏最爲詳確而尊前花間諸集往往謬其姓氏近傳歐陽永叔詞亦多有之皆失其真也世言風乍起爲延巳作或云成幼文也今此集無有當是幼文作長沙本以實此集中殆非也

家宴集五卷

陳氏曰序稱子起失其姓名雍熙丙戌歲也所集皆晉宋五代人樂府視花間不及也末有清和樂十八章爲其可以備勸故名家宴也

珠玉集一卷

陳氏曰晏元獻公殊撰其子幾道嘗言先公爲詞未嘗作婦人語以今考之信然

張子野詞一卷

陳氏曰都官郎中具興張先子野撰李常公撰爲六客堂子野與焉所賦詞卒章云也應傍有老人星蓋以自謂是時年八十餘矣東坡侔杭數與唱酬聞其買妾爲之賦詩首末皆用張姓事具興志稱其晚年漁釣自適至今號張釣魚灣死葬弁山下在今多寶寺按歐陽集有張子野墓誌死於寶元中者乃博州人名姓字偶皆同非吳中之子野也

古今詩話云客有謂張子野曰人皆謂公爲張三中即心中事眼中淚意中人也公曰何不目爲張三影客不曉公曰雲破月來花弄影嬌柔嬾起簾櫳捲花影柳徑無人墜飛絮無影此余平生所得意也又高齊詩話云子野嘗有詩云浮萍斷處見山影又長短句雲破月來花弄影又云隔牆送過秋千影並膾炙人口世謂張三影茗溪漁隱云細味二說當以古今詩話所載三影爲勝



東坡曰子野詩筆老健歌詞乃其餘波耳湖州西溪詩云浮萍斷  
處見山影野艇歸時聞草聲與予和詩云愁似鰥魚知夜永懶同  
蝴蝶爲春忙若此之類亦可追配古人而世俗但稱其歌詞昔周  
昉畫人物皆入神品而世但知有周昉士女蓋所謂未見好德如  
好色者也

杜壽域詞一卷

陳氏曰京兆杜安世壽域撰未詳其人詞亦不工

六一詞一卷

陳氏曰歐陽文忠公脩撰其間多有與花間陽春相混者亦有鄙  
褻之語一二廁其中當是他人無名子所爲也

樂章集九卷

陳氏曰柳三變耆卿撰景祐元年進士官至屯田員外郎世號柳  
屯田初磨勘及格昭陵以其浮薄罷之後乃更名求其詞格固不

高而音律諧婉語意妥帖承平氣象形容曲盡尤工於羈旅行役  
若其人則不足道也

藝苑雌黃柳之樂章人多稱之然大旣非羈旅窮愁之詞則閨門  
淫媠之語若以歐陽永叔蘇子瞻黃魚直張子野秦少游輩較之  
萬萬相遼彼其所以傳名者直以言多近俗俗子易曉故也

東坡詞二卷

陳氏曰蘇文忠公軾撰集中戚氏叙穆天子西王母事世不知所  
謂李端叔跋詳之蓋在山中燕席間有歌此闕者坐客言調美而  
詞不典以請于公公方觀山海經即叙其事爲題使妓再歌之隨  
其聲填寫歌竟篇就纔點定五六字而已李端叔時在莫府目擊  
必不誣或言非坡作豈不見此跋耶

山谷黃氏曰東坡居士曲世所見者幾百首或謂於音律小不諧  
居士詞橫放傑出自是曲子內縛不住者



後山詩話東坡以詩為詞如教坊雷大使之舞雖極天下之工要非本色

山谷詞一卷

陳氏曰黃太史庭堅撰晁無咎言魯直間作小詞固高妙然不是當家語自是著腔子唱好詩

淮海集一卷

陳氏曰秦觀撰晁無咎言少游詞如斜陽外寒鴉數點流水遶孤村雖不識字人亦知是天生好言語

晁無咎詞一卷

陳氏曰晁補之撰晁嘗云今代詞手惟秦七黃九他人不能及也然二公之詞亦自有不同者若晁無咎佳者固未多遜也

後山詞一卷

陳氏曰陳師道撰

閑適集一卷

陳氏曰晁端禮次膺撰熙寧六年進士兩為縣令忤上官坐保甲事中以危法廢徙晚乃以承事郎為大晟府協律三閱月而卒其從姪說之志其墓

晁叔用詞一卷

陳氏曰晁冲之撰歷卷漢官春梅詞行於世或云李漢老作非也

小山集一卷

陳氏曰晏幾道叔原撰其詞在諸名勝中獨可追逼花間高處或過之其人雖縱弛不羈而不苟求進尚氣磊落未可貶也

山谷黃氏小山集序曰晏叔原臨淄公之莫子也磊隗權竒踈於顧忌文章翰墨自立規摹常欲軒輊人而不受世之輕重諸公雖愛之而又以小謹望之遂陸沉於下位平生替心六藝玩思百家持論甚高未嘗以治世余嘗怪而問焉曰我繁躡教宰猶獲罪於



諸公憤而吐之是唾人面也乃獨嬉弄於樂府之餘而寓以詩人句法精壯頰挫能動搖人心士大夫傳之以爲有臨淄之風爾罕能味其言也余嘗論叔原固人英也其癡亦自絕人愛叔原者愠而問其目曰仕宦連蹇而不能一傍貴人之門是一癡也論文自有體不肯一作新進士語此又一癡也費資千百萬家人飢寒而面有孺子之色此又一癡也人百負之而不恨已信人終不疑其欺已此又一癡也乃共以爲然雖若此至其樂府可謂俠邪之大雅豪士之鼓吹其合者高唐洛神之流其下者豈減桃葉團扇哉余少時聞作樂府以使酒玩世道人法秀獨罪余以筆墨勸淫於我法中當犁舌之獄特未見叔原之作耶雖然彼富貴得意室有情盼慧女而主人好文必當市購千金家求善本曰獨不得與叔原同時耶若乃妙年美士近知酒色之娛苦節臞儒晚悟裙裾之樂鼓之舞之使宴安酖毒而不悔是則叔原之罪也哉

直集二卷後集一卷

陳氏曰周邦彥美成撰多用唐人詩語彙括入律混然天成長調尤善鋪叙富艷精工詞人之甲乙也

東山寓聲樂府三卷

陳氏曰賀鑄方回撰以舊譜填新詞而別爲名以易之故曰寓聲宛丘張氏序略曰余友賀方回博學業文而樂府之詞妙絕一世携一編示予大抵倚聲而爲之詞皆可歌也其盛麗如游金張之堂而妖冶如攬嬌施之祛幽索如屈宋悲壯如蘇李覽者自知之

東堂詞一卷

陳氏曰毛滂澤民撰本以斷魂分付潮回去見賞東坡得名而他詞雖工未有能及此者

百家詩序云元祐中東坡在杭澤民爲法曹掾公以衆人遇之秩滿辭去是夕宴客有籍妓歌贈別小詞卒章云今夜山深處斷魂



分付潮回去坡問誰所作以毛法曹對公語坐客曰郡僚有詞人不及知其罪也翌日折簡追還留連數月澤民由此知名

溪堂詞一卷

陳氏曰謝逸無逸撰

竹友詞一卷

陳氏曰謝過幼槃撰

冠柳集一卷

陳氏曰王冠通叟撰號王逐客世傳霜瓦鴛鴦其作也詞格不高以冠柳自名則可見矣

姑溪集一卷

陳氏曰李之儀端叔撰

聊復集一卷

陳氏曰安定郡王趙令時德麟撰

詞一卷

陳氏曰蘇庠養直撰

大聲集五卷

陳氏曰万俟雅言撰嘗遊上庠不第後為大晟府製撰周美成田

不伐皆為作序

石林詞一卷

陳氏曰葉夢得少蘊撰

蘆川詞一卷

陳氏曰三山張元幹仲宗撰坐送胡邦衡詞得罪秦相者也

東坡詞一卷

陳氏曰陳克子高撰詞格頗高麗晏周之流亞也

簡齋詞一卷

陳氏曰陳與義撰



劉行簡詞一卷

陳氏曰劉一止撰嘗為曉行詞盛傳於京師號劉曉行  
順庵樂府五卷

陳氏曰康與之伯可撰與之父俾惟章詭誕不檢事見揮麈錄與  
之又甚焉嘗挾兵下妓趙主以遁與蘇師德仁仲有隙遂與蘇泚  
訓直之獄玘仁仲之子而常同子正之壻也與之受知於子正一  
朝背之士論不齒周南仲嘗為作傳道其實如此所傳康伯可詞  
鄙褻之甚此集頗多佳語陶定安世為之序王性之蘇養直皆稱  
之而其人不自愛如此不足道也

樵歌一卷

陳氏曰朱敦儒希真撰

初寮詞一卷

陳氏曰王安中撰

丹陽詞一卷

陳氏曰葛勝仲撰

酒邊集一卷

陳氏曰戶部侍郎向子諲伯恭撰自號薌林

致堂胡氏序曰詩出於離騷楚詞而離騷者變風變雅之意迫而  
哀傷者也其發乎情則同而止乎禮義則異名之曰曲以其曲盡  
人情且方之曲藝猶不逮焉其去曲禮則益遠矣然文章豪放之  
士鮮不寄意於此者隨亦自掃其跡曰謔浪遊戲而已唐人為之  
最工者柳耆卿後出掩衆製而盡其妙好者以為不可復加及眉  
山蘇氏一洗綺羅香澤之態脫綢繆宛轉之度使人登高望遠  
舉首高歌而逸懷一氣超乎塵垢之外於元花間為皂隸而柳氏  
為輿臺矣薌林居士之於蘇而齊其畝者也其退江北所作  
於後而進江南所作於前以杜木之心行出龍華酌元酒之樽弄



置醇味非蒸而不色安能以此

漱玉集一卷

陳氏曰易安居士李氏清照撰元祐名士李格非文叔之女嫁東武趙明誠德甫晚歲頗失節別本分五卷

得全詞一卷

陳氏曰趙忠簡鼎元鎮撰

蕉尾集一卷

陳氏曰韓元吉撰

放翁詞一卷

陳氏曰陸游撰

石湖詞一卷

陳氏曰范成大撰

友古詞一卷

陳氏曰左中大夫莆田蔡仲神道撰自一死友古居士右護之孫

相山詞一卷

陳氏曰王之道彦猷撰

浩歌集一卷

陳氏曰蔡柟堅老撰

于湖詞一卷

陳氏曰張孝祥安國撰

稼軒詞四卷

陳氏曰寶謨閣待制辛棄疾幼安撰信州本十二卷視長沙為多

可軒曲林一卷

陳氏曰盱江黃人傑叔萬撰

王武子詞一卷

陳氏曰未詳其名字



樂齋詞一卷

陳氏曰向滿豐之撰

鳳城詞一卷

陳氏曰三山黃定泰之撰乾道壬辰榜首

竹坡詞一卷

陳氏曰周紫芝撰

介庵詞一卷

陳氏曰趙彥端撰

竹齋詞一卷

陳氏曰吳興沈瀛子壽撰

書丹詞一卷

陳氏曰眉山程垓正伯撰王稱季平為作序

燕喜集一卷

陳氏曰曹冠宗臣撰

退圃詞一卷

陳氏曰鎮洸馬寧祖奉先撰

省齋詩餘一卷

陳氏曰衡陽廖行之天民撰

克齋詞一卷

陳氏曰苕溪沈端節約之撰

敬齋詞一卷

陳氏曰臨川吳益仲權撰

逃禪集一卷

陳氏曰清江揚無忌補之撰世所傳江西墨梅即其人也

袁去華詞一卷

陳氏曰袁章素去華宣卿撰



燕隱詞一卷

陳氏曰毛并平仲撰

盧溪詞一卷

陳氏曰王庭珪民瞻撰

知稼翁集一卷

陳氏曰考功郎官莆田黃公度師憲撰紹興戊午大魁坐與趙忠簡往來得棄棄檜流落嶺表更化召對為郎未幾死年纔四十八

呂聖求詞一卷

陳氏曰將李呂渭老聖求撰宣和末人嘗為胡士

退齋詞一卷

陳氏曰長沙侯延慶季長撰壓卷為天寧節當年歡又有庚寅京師作水調則大觀元年

金谷遺音一卷

陳氏曰石孝友次仲撰

歸愚詞一卷

陳氏曰葛立方常之撰

信齋詞一卷

陳氏曰葛郊謙問撰

澗壑詞一卷

陳氏曰雙井黃談子默撰

懶窟詞一卷

陳氏曰東武侯宣彥周撰其曰毋勇是留守者謙之也紹興中以直學士知建康

王周士詞一卷

陳氏曰長沙王以寧周士撰

洪堂集一卷



陳氏曰盧炳叔易撰

定齋詩餘一卷

陳氏曰三山林淳大冲撰

漫堂集一卷

陳氏曰豐城鄧元南秀撰

養拙堂詞集一卷

陳氏曰董鑑明仲撰

坦庵長短句一卷

陳氏曰趙師俠介之撰

晦庵詞一卷

陳氏曰李昶全粹伯撰淳熙中待御史

近情集一卷

陳氏曰鄱陽王大受仲可撰

野逸堂詞一卷

陳氏曰歷陽張孝忠正臣撰

松坡詞一卷

陳氏曰京鏗仲遠撰

默軒詞一卷

陳氏曰豫章劉德秀仲洪撰慶元中為簽樞

岫雲詞一卷

陳氏曰長沙鍾將之仲山撰嘗為編脩官

西樵語業一卷

陳氏曰廬陵楊炎止濟翁撰

雲谿樂府四卷

陳氏曰魏子敬撰未詳何處人

西園鼓吹二卷



陳氏曰徐得之思叔撰

李東老詞一卷

陳氏曰李叔獻東老撰

東浦詞一卷

陳氏曰韓玉溫甫撰

李氏花萼集五卷

陳氏曰廬陵李氏兄弟五人洪子大漳子清冰子永滄子乃淵子

秀皆有官閑

好庵遊戲一卷

陳氏曰莆田方信孺乎若撰開禧小使入虜廷後至廣西漕

鶴林詞一卷

陳氏曰簡池劉光祖德脩撰紹熙乙巳臣為御史起居郎晚以雜學士終蜀之耆德有文集未見

笑笑詞集一卷

陳氏曰臨江郭應祥承禧撰嘉定間人自南唐二主詞而下皆長沙書坊所刻號百家詞其前數十卷皆名公之作其末亦多有濫吹者市人射利欲富其部帙不暇擇也

蕭閑集六卷

陳氏曰蔡伯堅撰靖之子陷虜者

吳彥高詞一卷

陳氏曰吳激彥高撰米元章之婿亦陷虜二人皆貴顯

白石詞五卷

陳氏曰姜夔堯章撰

西溪樂府一卷

陳氏曰姚寬令威撰

洮湖詞一卷



陳氏曰金壇陳從古晞顏撰

審齋詞一卷

陳氏曰東平王千秋錫老撰

西野詞一卷

陳氏曰魯觀撰孝宗潛邸人怙寵依勢世號魯龍者也龍名大淵

蓮社詞一卷

陳氏曰張掄才甫撰

梅溪詞一卷

陳氏曰汴人史達祖邦卿撰張約齋鑑為作序不詳何人

竹屋詞一卷

陳氏曰高觀國賓王撰亦不詳何人高郵陳造併與史二家序之

劉改之詞一卷

陳氏曰襄陽劉過改之撰

冷然齋詩餘一卷

陳氏曰蘇洞召叟撰

蒲江集一卷

陳氏曰永嘉盧祖臯申之撰

欵乃集八卷

陳氏曰昭武嚴次山撰欵音暖乃如字余嘗辨之甚詳

花翁詞一卷

陳氏曰孫惟信季蕃撰

蕭閑詞一卷

陳氏曰陳子耕撰

註坡詞二卷

陳氏曰德裕傳餘

註琴趣外篇三卷



陳氏曰江陰曾鴻註葉石林詞

註清真詞二卷

陳氏曰曾杓季中註自稱一壺居士

復雅歌詞五十卷

陳氏曰題銅陽居士序不著姓名末卷言宮詞音律頗詳然多有調而無曲

樂府雅詞十二卷拾遺二卷

陳氏曰曾慥編

曾氏自序畧曰予所藏名公長短句裒合成編或後或先非有銓次多是一家難分優劣涉諧謔則去之名曰樂府雅詞調笑集句歐公一代儒宗風流自命詞章幼眇世所矜式當時小人或作豔曲繆為公詞今刪除凡三十有四家雖女流亦不廢此外有百餘闕平日膾炙人口或不知姓名則類于卷末以俟詢訪標曰

草堂詩餘二卷

類分樂章二十卷

群公詩餘後編二十二卷

五十大曲十六卷

萬曲類編十卷

陳氏曰皆書坊編集者

陽春白雪五卷

陳氏曰趙

編取草堂詩餘所遺以及近人之作

文獻通考卷之二百四十六



文獻通考卷之二百四十七

鄱陽馬端臨貴與著

經籍考

集章奏

陳氏曰凡無他文而獨有章奏及雖有他文而章奏復獨行者亦別為一類

漢名臣奏一卷

陳氏曰按隋志刑法類有漢名臣奏事三十卷唐志已亡其中興書目僅存其二一為孔光一為唐林今惟唐林而已所言皆奏朝事無足論者姑以存古云爾

唐魏鄭公諫錄五卷

陳氏曰唐尚書吏部郎中琅邪王綝集綝字方慶以字行相武后其為吏部當在高宗時館閣書目作王綝誤也所錄魏公進諫奏



對之語又名魏文貞公故事

陸宣公奏議二十卷

陳氏曰唐宰相嘉興陸贄敬輿撰又名勝子集

議論並見別集類

李司空論諫集七卷

晁氏曰唐李絳深之贊皇人貞元八年進士中宏詞補渭南尉六年進中書侍郎平章事太和初為山南西道節度使四年南蠻入寇為亂兵所害絳偉儀實以直道進退望冠一時賢不肖太分屢為讒邪所中平生論諫數千百事其甥夏侯孜所編史官蔣偕為序

令狐公表奏十卷

晁氏曰唐令狐楚字殼士撰楚相憲宗為文善於箴奏自為序云登科後為桂井四府從事掌箴奏者十三年始遷御史綴其藁得

一百六十三篇自號曰白雲孺子

陳氏曰楚長於應用嘗以直取李商隱

包孝肅奏議十卷

晁氏曰包拯字希仁合肥人天聖五年進士為御史中丞知開封府為人剛嚴無私聞者皆憚之

汪玉山序公奏議分門編類其事之首尾時之先後不可考也如請那移河北兵馬凡三章其二在第八卷議兵門其一廼在第九卷議邊門其不相貫穿如此今考其歲月繫於每章之下而記其履歷於後若其歲月可見於章中者不復重出與夫不可得而考者不容於不闕也庶幾讀者尚可以尋其大槩云如劾罷張方平末初三司使而奏議不載豈包氏子孫所不欲以示人者耶

范文正公奏議二卷

陳氏曰范仲淹撰



謙坦存藁三卷

陳氏曰韓琦撰

富文忠公劄子十六卷

陳氏曰富弼撰平生歷官辭免陳情之文也

從諫集八卷

陳氏曰歐陽脩撰

南臺諫垣集二卷

陳氏曰參政信安趙抃闕道撰

范貫之奏議十卷

直龍圖閣范師道貫之撰曾南豐序曰自至和以後十餘年間公常以言事任職自天子大臣至于群下自掖庭至于四方幽隱一有得失善惡關於政理公無不極意反復爲上力言或矯拂情欲或切劘計慮或辨別忠佞而趣其進退章有一再或至於十餘上

事有陰爭獨陳或悉引諫官御史合議肆言仁宗常虛心采納爲之變命令更廢舉近或立從遠或越月踰時或至於其後卒皆聽用蓋當是時仁宗在位歲久熟於人事之情僞與群臣之能否方以仁厚清淨休養元元至於是非與奪則一歸之公議而不自用也其所引拔以言爲職者如公皆一時之選而公與同時之士亦皆樂得其言不曲從苟止故天下之情因得畢聞於上而事之害理者常不果行至於寄表恣睢有爲之者亦輒敗悔故當此之時常委事七八大臣而朝政無大闕失群公奉法遵職海內乂安夫因人而不自用者天也仁宗之所以其仁如天至於享國四十餘年能承太平之業者繇是而已後世得公之遺文而論其世見其上下之際相成如此必將低回感慕有不可及之歎然後知其時之難得則公言之不沒豈獨見其志所以明先帝之盛德於無窮也

呂獻可奏章二十卷



晁氏曰呂誨字獻可熙寧中爲御史中丞坐攻王安石知鄧州司馬溫公服其知人且序其章奏集云其草存者二百八十有九歷觀古人有能得其一二者已可載之史籍在獻可蓋不足道也

陳氏曰獻可丞相正惠公端之孫也

孫莘老奏議十卷

晁氏曰孫覺字莘老元豐末自秘書少監除右諫議大夫元祐初遷給事中吏部侍郎莘老素與王介甫善後爲諫官論新法遂絕

李公擇廬山奏議十七卷

陳氏曰李常字公擇早年讀書於廬山熙寧間爲諫官論青苗法而罷元祐初爲御史中丞

范蜀公奏議二卷

晁氏曰范鎮字景仁成都人舉進士爲禮部第一仁宗朝知諫院後言王安石新法不便乞致仕歸潁昌元祐初詔召不赴封蜀郡

公年八十一謚忠文

經緯集十四卷

陳氏曰樞密副使會稽孫抃元規撰

傅顯簡奏議四卷

陳氏曰傅堯俞撰

汪玉山跋畧曰范忠宣公誌公墓曰司馬溫公言傳欽之清且勇邵康節謂欽之清而不耀直而不訐勇而能溫云

范忠宣彈事五卷國論五卷

陳氏曰范純仁撰

范德孺奏議二十五卷

陳氏曰龍圖閣直學士范純粹德孺撰文正公三子中子純禮彞叟至尚書右丞純粹守邊有將才文正嘗謂仁得其忠禮得其辭粹得其畧其長子純祐天成尤英悟不幸病廢蚤世富文忠深惜



之為作墓誌

盡言集十三卷

陳氏曰諫議大夫元城劉安世器之撰

王明叟奏議二卷

陳氏曰翰林學士海陵王觀明叟撰坐黨籍謫臨江而卒其在朝專論蘇程朋黨之弊以為深患

丁騫奏議一卷

陳氏曰右正言毗陵丁騫撰元祐中在諫坡嘉祐二年進士也

諫垣集二卷

陳氏曰陳瓘撰

閑樂奏議一卷

陳氏曰殿中侍御史建陽陳師錫伯修撰熙寧九年第進士裕陵素知其文行擢為第三人蘇軾知湖州師錫掌書記軾下御史獄

師錫篤賓友之義安輯其家軾入西掖薦自代明著其事師錫在

元豐已為察官坐論進士習律罷出建中靖國再入未幾又罷

河間公奏議十卷

晁氏曰朱光庭元祐中為諫官時所論事也

得得居士蕙草一卷

陳氏曰正言眉山任伯雨德翁撰其論蔡卞章惇欲廢宣仁尤切故卞深恨之獨貶嶺外

龔彥和奏疏一卷

陳氏曰殿中侍御史河間龔夫彥和撰二陳任龔皆建中靖國言事官極論蔡京者也

石林奏議十五卷

陳氏曰葉夢得撰

石林自序志愧集曰進對以來奏藁藏於家者若干篇不忍盡弃



乃序次爲十卷目之曰志愧集夫天下豈無大安危生民豈無大休戚矧戎狄亂華中原分裂上方擲沐風雨旰食圖功而身遭不世之主橫被非常之知所言儘如是而已心非木石安得不媿姑自識之留以遺子孫庶後世悼其意之不終或有感動奮發慨然少能著見者猶足雪其無功之耻而償其未報之恩也

虞雍公奏議

丞相虞允文撰後溪劉氏序畧曰余讀雍國忠肅虞公奏議二百二十有七篇而慨然有感世但知采石之戰以七千卒卻虜兵四十萬其功甚偉然忌者猶曰適然豈知公於紹興辛巳之前已因輪對面奏虜必叛盟兵必分五道正兵必出淮西奇兵必出海道宜令良將勁卒備此二境其先事之識已絕出乎衆人之表矣及虜叛盟上令從臣集議公獨言虜兵必出兩淮丞相善其言而未果行及遣公勞師采石事已大壞公以書生一收合亡卒激厲諸將

施置於倉卒之際而破虜於俄頃之間嗚呼非胸中素所蓄積忠誠足以動天地感人心而作士氣未易成此偉績也而曰適然可乎自昔狃勝者必忽其餘憂公又令設備於瓜洲其他區畫悉各精密而不苟虜遂遁去乃徐請車駕還行都皆歷歷見於奏疏也余切妄論本朝多議論少成功雖盛時猶然也况積習消靡之餘夫人皆喜逸而惡勞圖安而懼危中興以來前有張魏公後有虞雍公爲國家任其勞當其危者也彼不少媿焉而又忍短毀之乎連寶學奏議二卷

陳氏曰寶文閣學士安陸連南夫鵬舉撰紹興初知饒州扞禦有功及和議成南夫知泉州上表畧曰不信亦信其然豈然又曰雖虞舜之十二州昔皆吾有然商於之六百里當念爾欺由是得罪若溪奏議一卷

陳氏曰資政長城劉珏希范撰嘗以同知三省樞密院扈從隆祐



南幸

毗陵公奏議二十五卷

陳氏曰張守撰

陳國佐奏議十二卷

陳氏曰禮部侍郎赤城公輔國佐撰政和三  
興初為諫官  
合釋褐首選紹

胡忠簡奏議四卷

陳氏曰胡銓撰

玉山表奏一卷

陳氏曰汪應辰撰

陳正獻奏議二十卷表劄二十卷

陳氏曰陳俊卿撰

龔實之奏藁六卷

陳氏曰龔茂良撰

南軒奏議十卷

陳氏曰張拭撰

胡獻簡奏議八卷臺評二卷

陳氏曰禮部尚書會稽胡沂撰

梅溪奏議三卷

陳氏曰太子詹事樂清王十朋龜齡撰

省齋歷官表奏十二卷

陳氏曰周必大撰

軒山奏議二卷

陳氏曰王簡撰

北山驚議一卷

陳氏曰戶部侍郎濡須王邁少愚撰蘭之兄開禧中諫用兵



李祭酒奏議一卷

陳氏曰國子祭酒錫山李祥元德撰慶元初論救趙忠定得罪者  
齊齋奏議三十卷掖垣繳論四卷銀臺章奏五卷臺諫論二卷昆命  
元龜說一卷

陳氏曰倪思撰

文獻通考卷之二百四十七



